





四溟山人全集卷之四

東郡 謝 榛 著

東郡 蘇 潢

赤城 陳 養才 全校

東郡 新安 張季彦 程兆相 全閱 詳按

五言律詩一百二十首

武皇巡幸歌四首

神武驅兵日南征氣赫然射蛟江水上立馬石城邊  
羽檄飛三楚霓旌拂九天功成凱歌夜月色送樓船



齊魯巡遊地蒼生見紫微晴雲隨鷁舫春水照龍衣  
柳畔千官擁沙邊七校圍觀魚移白日鼓吹月中歸

三

玉輦衝寒色蕭蕭八駿鳴兔河冰上過狐嶺雪中行  
撫劍群胡遁彎弓百獸驚當年赤帝子空到白登城

四

年少羽林郎嚴冬較獵忙旌旗開御道劔戟擁長楊  
飛去五花馬射來雙白狼中官傳賜酒甲冑拜君王

憶山中人

我憶餐霞客翛然卧翠微往來猿鶴侶寒暑薜蘿衣

石鏡心相照雲窓世自違碧桃春又暮應不嘆花飛  
有感

薄伐元中策論兵自古難漢唐頻拓地將帥幾登壇  
絕漠兼天盡交河蕩日寒不知大宛馬曾復到長安  
寄上趙王枕易殿下

松桂兔園秋誰從帝子游天風吹玉笛夜月見瑤樓  
旅鴈復南下官河空北流應懷謝莊賦吾意老滄洲

春夜卽事

春草非吾土春宵還自悲庭虛風稍靜簾捲月何遲  
久病兒知藥長吟妻解詩他年學耕稼肯負鹿門期



麗情曲

昔會春江曲美人知我心朝遺白玉佩夕贈紫璫琴  
夢入楚天遠愁連湘水深刺桐花又落黃鵠斷佳音

春宮詞

盈盈上陽女愁思起中宵月白瑠窓靜花深玉輦遙  
曉霞憎國色春柳妬宮腰不見長門賦傷心有阿嬌  
清涼山秋夜聽兒元燦彈琴

吾兒解幽事露坐一彈琴聲落石崖迴興當秋夜深  
潭龍乘月色山鬼傍松陰颯颯天風起清商滿翠岑  
暮秋對雨感懷

山昏雲到地江白雨連天鴻鴈寒無賴芙蓉秋可憐  
旅懷聊獨酌世事且高眠悽惻登樓賦誰知王仲宣  
重陽集李給事仲西宅無菊

眼前不滿意身外更何嗟北塞仍過鴈東籬未有花  
客懷虛此日秋色在誰家不盡清樽興登高送落霞  
秋暮憶翠峯禪師

忽憶西山寺行歌秋意殘霜前萬木落天外一峯寒  
妙悟惟支遁真如自道安法雲遶松栢清夜與誰看

俠客行

家住渭橋邊追隨俠少年闔雞輸寶劍逐兔落金鞭



日下長楸陌霜高太白天新從霍驃騎裘馬獨翩翩

秋野

地闊清霜滿林寒赤葉稀野雲秋澹澹山日晚輝輝  
殺氣三河動邊聲一騎飛中原多猛士誰解晉陽圍

暮秋卽事

十見黃花發孤樽思不勝關河秋後鴈風雨夜深燈  
留滯悲王粲交游憶李膺相隨少年子走馬獵韓陵

同宋子純杜約夫晚渡漳河訪李叔東

幽期何憚遠秋色滿山川月出平林外人行落鴈邊  
水村時下馬沙岸夜呼船正有東籬菊相拚醉不眠

寄張崇德

空庭黃葉下風物豈鄉關獨夜人南北流年鴈往還  
亂雲低古塞積雨暗秋山爾亦悲搖落孤雲鬢

去婦吟

來時雙玉佩去日一璫簪賤妾秋蘭意良人明君心  
舞鸞成獨影別鶴動哀音回首長千里西風吹素襟

寄北海馮汝強

曠矣青雲路淒其白髮年病多還自遣賦就幾人憐  
三徑迷秋草孤鴻斷雪天相期九節杖定訪十洲仙

毛侍御仁甫幽居



早年歸別業高枕遠浮名樹杪孤雲度門前一水橫  
黃花留晚計白鳥識幽情爲愛嵇中散踈慵是養生

登天壇山

直上斷崖懸崎嶇一徑緣白雲秋滿壑紅樹老參天  
神護軒皇鼎靈通太乙泉何由結丹侶共此學長年  
春日柬曹方伯仲禮

春風起河甸城市有端居興逸投簪後名高抗疏餘  
白雲低几杖青草上堦除幾約浮丘伯中峰昨報書

春園

水村人寂寂遲日敞柴關菜甲春初細園丁雨後閒

沙邊來白鳥柳外出青山此地多幽意行歌薄暮還

寒食

踈才淹上國舊業夢西河寒食松楸遠春衣雨雪多  
青山期不負黃鳥意如何憶昔看花侶相將一醉歌  
晚夏天寧寺對雨同殷正夫李于鱗賦

諸天忽風雨蕭颯動山扉殿冷鴿逾靜鉢空龍未歸  
晚留軒冕客秋到薜蘿衣後夜懷支遁遙聽鐘磬微

送杜太僕謫荊州

謫宦三千里誰憐賈傅才漢江秋月上楚岫夜猿哀  
心事登樓賦年光落帽臺知君最愁絕湘鴈逐春來



寶慶寺見桂花

桂花秋正發，禪院幾徘徊。我愛淮南種，今當薊北開。  
清芬對祇樹，金粟見如來。幽興惟康樂，東林夜不回。

南園秋暮

地僻青山近，庭空白露溥。鳴蟬秋共老，落木夜多寒。  
惆悵鄉書滯，踈慵世路難。遙思籬下菊，兒女不同看。

榆河晚發

朝暉開衆山，遙見居庸關。雲出三邊外，風生萬馬間。  
征塵何日靜，古戍幾人閒。忽憶棄繻者，空慙旅鬢斑。  
隆慶道中有感

馬度黃雲塞，鷗飛白草原。兵戈連歲動，霜霰入秋繁。  
農業千家廢，人煙幾處存。中途有行子，佇目亦銷魂。

榆林道中言懷

秋風吹短褐，長嘯過居庸。羸馬有歸思，枯蓬無定蹤。  
山橫邊色斷，日沒野陰重。旅鬢成衰颯，誰知阮嗣宗。

北征二首

朔氣犯征裘，旌懸大漠秋。亂山通驛道，殘日照邊樓。  
白骨幾年戰，黃雲終古愁。夜來烽火急，驕虜寇并州。

二

復選防秋將，誰揮返日戈。二庭飛檄動，六郡俠兒多。



驅馬朝登嶺，銜枚夜渡河。奇兵斷虜後，歸路聽銜歌。  
初冬夜同李伯承過碧雲寺

並馬尋名寺，登高藉短筇。飛泉鳴古澗，落月在寒松。  
石路經千轉，雲巖復幾重。人間多夢寐，誰聽上方鐘。  
送史德龍下第歸江都

送送蕪城客，南歸暫索居。沙雲鷗鳥畔，江雨稻花初。  
白髮愁看鏡，青山坐讀書。漢庭知己在，早晚薦相如。  
暮春晦夜同馮汝強汝言昆季餞別章行人  
景南使上黨得光字

官舍延星使，燈前數舉觴。何當添夜漏，聊復駐春光。  
鴻鴈北來盡，關山西去長。贈君有芳草，歲晏莫相忘。  
送曹別駕毅父之晉州

嗟爾恒山謫，離亭且駐車。宦情春草後，行色曙星初。  
桑梓淮南夢，關河薊北書。佩刀應自惜，去矣莫躊躇。  
夏夜獨坐披襟當風，頗有秋意，賦此寄懷

散髮南樓夜，翛然披素襟。蛩聲依草際，螢火落牆陰。  
老破當年夢，秋生久客心。遙思苔石上，坐聽美人琴。  
夏夜集王元美宅，同朱伯鄰、馮汝言、吳峻伯、徐汝思、李于鱗得絲字

獻賦長爲客，風塵鬢易絲。投珠還自惜，倚玉幾相知。



庭曠生秋早城高度月遲聊同河朔宴定擬竹林期  
禪林寺贈本無上人

步屨來金界鳴鐘落翠微松陰迴古殿山氣入秋衣  
身向諸天老心從初地歸後期薜蘿月寧遣夢中違  
盤山晚行

日落山蒼然高林鳴亂蟬行人拾墮栗倦馬顧流泉  
秋淨石崖路寒深松壑煙遙遙見燈火欲借上方眠  
盤山最高峯遲應瑞伯不至

仄徑高盤壁孤峯半插天人行飛鳥上袖拂落霞邊  
澗水寒逾咽山花晚自妍一樽遲儔侶松月向誰圓

對菊

千家輕節序誰復醉高秋菊帶淒涼色人經離亂愁  
早霜明漢苑落木響燕州獨有餐英者悲歌殊未休  
楊以時復遊都下

亂後相逢日論交半已非謀生雙鬢改感舊十年歸  
帆落煙中浦琴鳴竹裏扉重來傍燕市霜露滿秋衣  
曉起

久客倚樓時悠然動遠思早曦光未徹寒霧散何遲  
興在陶潛酒心關阮籍詩西山芳蕙歇策杖復何之  
和錢起送僧歸日本



浮天東盡處萬里渺歸蹤時值風濤靜遙分島嶼重  
孤篷占日月清梵出魚龍尚憶西方路雲深漢闕鐘

詠琴送劉仲安宰新建

我愛瑤琴古因之贈美人鍾期不可見子賤獨相親  
月下清流急松間幽興新能將白雪調散作楚江春  
送樊侍御文叙之金陵

地入維揚路天分牛斗墟秋帆二水外春草六朝餘  
冰雪生官舍風塵走諫書從來經國者寧不念樵漁

劉生

劉生遊俠子交結趙平原手把一龍劍腰懸雙豹韃

黃雲來朔漠白馬出都門力盡三秋戰深知報主恩

夜集有客憶江南梅花

坐有三吳客天寒重所思梅花何處發春信隔江遲  
雪月搖踈影山村出幾枝羅浮遙入夢鄰笛不須吹

除夕示兒元炳兼憶元輝諸兒

對汝還成嘆寒更坐轉深異鄉垂老計春草隔年心  
蠟炬明殘夜天風破積陰遙憐幾稚子酒罷一長吟

清明憶諸弟

白髮感平生幽懷阮步兵抱疴頻藥餌爲客幾清明  
春滿他鄉樹河連故國城鵲鴿限南北空復在原情



日暮

帶月傳軍檄乘春造戰車中原募兵後北虜請和初  
氣動臧宮劔憂深賈誼書漢庭無定策日暮重愁予

重過張氏園林二首

駐馬深林下名園兩度遊獨尋花裏徑更上竹西樓  
池鳥尚相語山雲澹不流却思離亂日松菊負高秋

二

隨處携鳩杖狂時倒鶻冠晚山當座出風竹滿樓寒  
獨酌世情遠長歌春事殘不知桃李發白首幾迴看

曉起

曉起正科頭時聞花外鳩出門疎雨歇倚杖斷雲流  
綠草偏依水青山半入樓况逢春酒熟不負嗣宗遊

晚過西湖

悵望西山路曾經胡馬過重來把楊柳獨立向煙波  
日影峯頭盡春寒湖上多漁樵一相見猶爲話兵戈

夜自西湖循甕山同玉峯上人步歸蘭若

湖色吟春衣沙禽夜尚飛路隨山下轉僧伴月中歸  
祇樹藏金界禪燈出翠微他年謝靈運結社願無違

送悟正上人遊楚

不作雙林主今離猿鳥群高蹤何處定清梵幾時聞



鉢貯洞庭月錫穿衡嶽雲應懷舊禪侶鐘磬坐宵分  
初夏姚園同汪伯陽徐子旋李于鱗王元美  
皇甫子循得逢字

浮生各有役勝事幾相逢愛此池臺靜兼之花石重  
春聲餘獨鳥晚色亂諸峯莫遣芳時過徒嗟萍水蹤  
夏日張氏園亭同徐子旋李于鱗賈守準劉  
子成王元美得窓字

迤邐繁陰合林亭詎有雙日斜青草徑秋在白雲窓  
勝事同金谷高歌對玉缸百年耕鑿計吾媿鹿門龐  
程侍御信夫見召

相違日多事相憶共燕城此夜琴樽約他鄉故舊情  
朝廷重桓典歲月老虞卿官舍秋花發青驄可更迎  
夜雨酌殷翰林書齋

巷陌通僊館來當秉燭時論文間世變下榻見心期  
金馬天逾迴銅龍漏轉遲一樽風雨夜長此繫相思  
送何比部汝肅之金陵

悵別者誰子法曹何仲言孤帆下南浦幾日過中原  
江出維揚樹山開建業門秋懷應有賦白露滿芳蓀  
送張子畏使太原

六月皇華使千年白日陰雲連汾水關馬度井陘深



大將防邊策明王賞士心茂先有雄劍夜夜作龍吟

楚愚禪師見過

衲子來何處相留半日間  
卧雲超象外飛錫到人間  
神爽秋生壑心空月滿山  
晚來辭我去隔水聽鐘還  
贈任上人

飄然傳大士今復向南峰  
留偈高秋別傳心何處逢  
坐邊來野鳥定裏斷霜鐘  
我有清宵夢遙迷煙外松  
塞上老卒

家在石壕村長征無子孫  
多憂摧鬢髮百戰集瘡痕  
日晚巡狐塞天寒戍鴈門  
壯心時仗劍部曲幾人存

賦得邊馬有歸心

誰騎五花馬不惜千金裝  
北走胡天盡南嘶燕路長  
欲歸乘曉月何意立寒霜  
主將遲勳業刀頭空自傷  
秋夜柬李通政子漸

燕地逢君晚秋來樽酒期  
桂花相對夜烽火共憂時  
月隱長安樹雲低太液池  
誰能上封事獨有納言知  
秋夜柬張給事仲安

青瑣鄰丹禁天階逼斗樞  
宮雲兼樹冷海月傍簾孤  
諫草勞深思年華感易徂  
相逢北來使幾爲問邊隅  
送蘇子長之塞上



九月雲中去鳴鞭路不遙從軍自王粲投筆有班超  
塞日嘶天馬邊風起皂鷗五都豪俠士寧負羽書招  
送高子之塞上

冥鴻下江浦之子塞門行河迴寒沙斷城孤暮雪平  
壯年能躍馬知己重論兵亭障聞吹角秋風萬里情  
雪中過董光祿克相宅

不尋故鄉侶風雪此懷孤寒色明千嶂氷花淨九衢  
坐傾光祿酒疑過步兵厨我欲探梅去陽春在五湖  
張掖門哭送朱伯鄰歸櫬

交游臨道哭行者亦沾衣戎馬赤心在功名丹旆歸

城烏悲不起野日慘無輝舊業南湖上孤雲空自飛

諸王孫見招觀射兼餞別率爾賦此

王孫集車馬射圃又相期共試穿楊技還成折柳詞  
浮雲無定處征鴈有歸時別後汾川月愁光照遠思

趙王枕易見寄

有酒熟花香春未老好  
携書劒早歸來之句

江海通元氣風雲入浩歌行人猶未返芳草欲如何  
沙晚聞鳧鴈山春秀薜蘿淮南賦招隱悽惻感情多  
留別郭學士質夫

學士同樽酒相知老去深青雲司馬賦白日董狐心  
春氣浮東閣晴光動上林應憐多病客歸卧薜蘿陰



除夕徐子與宅同宣允則得年字

客裏歲時遷還來醉此筵吳歌憐子夜潘鬢感丁年  
列炬明深院繁星動遠天宮梅殊有意更向早春妍  
初春送鄒按察君哲之大梁

憑君吹玉律春意徧中原路轉黃河近沙平綠草繁  
漢庭三尺法梁獄幾人寬向夕成孤坐心清月滿軒

元夕道院同公實子與于鱗元美子相五君  
得家字

長空月正滿遊騎隘京華夜火分千樹春星落萬家  
乘閒來紫府垂老問丹砂笙鶴歸何處依稀見彩霞

憶王屋山

昔探王屋勝猶憶杖藜初野老窺丹洞山靈護寶書  
雲生苔壁暗松響石壇虛欲訪煙蘿子茫茫失舊廬  
寒食旅懷

薊北驚寒食淹留幾自嗟春風來燕子落日在桃花  
丘隴行邊淚江湖夢裏家不知踈懶客何物是生涯  
還鄴二首

客路多芳草還家春服成交游嗟獻賦妻子問謀生  
自得山林計深知猿鳥情一樽吟薄暮風雨閉柴荆

二



迢遙囊橐輕詞客本無營久別兒孫大初歸鷄犬驚  
幾年違舊業多事感浮生坐倚中庭樹春風可寄情

楊白花

多少宮中樹偏憐楊白花長風吹日暮春雪落天涯  
蕩子空相憶芳年謾自嗟月明愁不見啼殺禁城鴉

折楊柳

濯濯庭前柳垂條如許長影移青玉案色動鬱金裳  
人去孤春事鷺啼又夕陽城頭莫吹笛摧折更悲傷

梅花落

少婦何愁絕寒宵獨不眠梅花疎月下春色澹窻前

芳潔時相對飄零轉自憐一枝將遠寄不到阿郎邊

寄徐以言

憐君南下日風物正蕭森馬上憂時淚燈前草屣心  
孤懷聊歲月多病有山林應謝蘭亭侶春來自越吟  
張子畏使晉北歸見過草堂大雨對觴有作  
君來不共醉老眼向誰青莫謂淹行李相知感聚萍  
驚雷低里巷驟雨沒階庭後夜知何處天涯望使星

架邊

閒庭秋一色滿架豆花垂薄俗存吾計衰年習土宜  
煙中晚雀定露下候蟲知何限幽人意臨風獨立時



浮生

浮生不自惜，久客世情間。  
白日驅生事，黃金駐醉顏。  
業存三逕僻，心寄五湖閒。  
何處逢丹侶，煙霞信往還。

東園秋夜柬知己

悲歌殘燭下，秋思轉紛紛。  
落葉多驚雨，明河半隔雲。  
螢光時復見，蟲響夜多聞。  
誰是論心侶，清樽可共君。

秋夜試院彭教授子殷招飲兼呈在坐六廣

文

群才共今夕，北斗應文星。  
病後多幽意，歌邊肯獨醒。  
菊香微近坐，月色迴當庭。  
相約還臨眺，秋山湖上青。

靈巖寺同許克之夜賦

何物澹相對，蒼然獨象山。  
心空諸色界，月迴一禪關。  
鐘磬夜深寂，松蘿雲際閒。  
偈成連榻卧，無夢落人間。

登泰山

登攀絕頂處，封禪斷碑文。  
古洞尋丹液，秋衣拂紫氛。  
下飛關塞鴈，東接海天雲。  
惆悵秦松在，寒濤空自聞。

歲暮盧次梗過鄴有感

燕霜終古憤，梁獄昔年書。  
世事踈狂裏，交情患難餘。  
相看年欲老，多感歲將除。  
醉擬應劉賦，春風起敝廬。

初春同陳郎中汝忠登鄴城兼寄徐子與李



于鱗二比部

有客停驂日重城共一登晴煙開北渚春色上西陵  
中論懷徐幹高風識李膺薊門芳草路千里興堪乘  
送許中丞歸關中

官起煙塵際身歸兵甲餘曉星隨去馬春雪上行車  
二水堪垂釣三峯更著書野雲應不散長繞杜陵居

春日洹上過田深甫留酌

芳園閒共酌苔石坐相連春水明花外晴雲澹竹邊  
長歌仍客舍幽事且漁船尚有丹砂約寧忘白髮年

趙世府殿下誕生元嗣識賀

抱鄴山川秀王孫自不群地鍾龍子德天與鳳雛文  
碧殿迎華日瓊樓接瑞雲河間傳禮樂聲擬萬年聞  
千秋值雪賦上趙世孫承易殿下

王孫又初度瑞雪喜今朝滿樹春先動深宮寒自消  
繽紛來氣色遠近出瓊瑤欲擬惠連賦賓筵不待招

西園

老去青山計春來黃鳥期雲霞扶杖遠風雨看花遲  
易醉逢歌舞孤懷遣歲時徐陳不可見空憶建安詩

暮秋東園餞別鄒子序

老大交彌重窮愁賦可傳對君猶故國嗟我異當年



砌冷蛩邊草霞明鴈外天菊花留醉客秋色滿離筵

南伐

南伐驅千騎遙聞幾戰場青年多俠氣白骨半他鄉  
塞鴈悲秋老閨人哭夜長招魂渺何處天外月茫茫

孤坐

薄俗成孤坐長歌轉自悲鳴蟬風外斷歸鳥霧中遲  
薊北頻烽火睢陽復亂離世情聊一醉未必屈原知

秋庭

東園閒白日庭戶絕經過落葉聽無盡秋風來更多  
忽聞誅寇盜莫厭事兵戈賣劍今誰是愁雲渺大河

秋夜

廣庭秋寂寞霜落古桐枝倦鳥暮相聚鳴蟲寒自知  
蒼生多難日白首獨眠時寄語征南將論功爾莫遲

野望

迤邐高原上悲歌策杖遊霜寒空野色風晚急河流  
偶值潢池變無勞杞國憂野鳧驚復下飲啄自滄洲

暮秋大伾山禪院同孟得之盧次楸醉賦

勝遊隨故侶幽興在禪林石上晴雲起松間晚磬沉  
青山無久客黃菊有歸心我亦悲秋者樽前學楚吟

寄沈子剛



涼風吹短髮朔野正踟躕身遠艱危過才高意氣孤  
寒聲悲戍角秋色老邊榆俠少時相見藏名憶鏡湖  
偶述

萬事日悠悠其如鬢易秋古今同逝水天地一虛舟  
綠酒眼前醉黃金身外憂誰能學仙去長揖謝公侯  
寄吳總戎子陽

黃鬚鄴下子威振北征年萬里能籌國三秋長在邊  
草枯馳馬地霜冷射鵑天燕趙多豪士論功誰更先  
寄李狀元子實

暫假淮南去長吟桂樹秋自知班史在還結楚騷流  
山色朝侵榻江聲夜滿樓應懷金馬詔春水送仙舟  
寄張給事巽卿

千古一長嘆亡猿思楚中戒嚴殊不戰入援却論功  
青瑣天何遠黃雲塞欲空至今勞北望淮上起悲風  
野興

獨眺西山色蒼然風物繁漁樵秋草路鷄犬夕陽村  
積水明荒澤閒雲度廣原阮宣今已矣沽酒共誰論  
暮秋寄張隱君良玉

早寒閒閉戶霜露滿庭柯滄海故人遠青山秋思多  
老年還勝事昭代有狂歌尚憶春醪熟携琴偶一過



哭馮汝強并序

北海馮汝強少舉明經與予善九上春官不第竟以病死聞訃愴然情見乎辭

為惜大馮君才名一誅文年侵重丹鼎歲久斷青雲松檟秋何慘泉臺夜不分茫茫遼海上猿鶴復誰聞

四溟山人全集卷之四終

四溟山人全集卷之五

東郡 謝榛 著

東郡 蘇潢

赤城 陳養才 全校

東郡 新安 張季彦 程兆相 全閱 詳校

五言律詩一百二十首

高枕

垂老惟高枕經秋不到城孤吟來鳥雀萬事掩柴荆野曠浮雲色庭虛落葉聲祗應鄰叟過共話薜蘿情  
冬夜同張肖甫陸道函丁子學董子才王元



卿五明府醉賦

故人期秉燭官舍翕琴歌努力共知健憂心誰較多  
寒聲推苑樹晴影倒天河離合難常醉明宵載酒過  
成安道中懷古示同行故人

朋好共行役不堪岐路分西風馬上急朔鴈天邊聞  
趙壘但秋草漢旌空暮雲古來定交者獨嘆成安君

晚眺

寒日下西陵漳河晚渡冰孤城歸獵騎雙樹隱禪燈  
野眺心何遠巖棲老未能翻憐戎馬日愁思坐相仍

寄冷郡丞轉肅藩長史

君佐睢陽日移官憂更繁黃巾亂始定赤子業猶存  
自覺秦聲異難將楚調論戰雲時滿塞說劍在王門

風雪

風雪夜來聲關河老去情梅花春又到客子賦還成  
歲計多兒女鄉心只弟兄存亡重悽惻誰與慰平生

歲暮宴李太守于鱗宅二首

別來吾更老薊北尚征塵詞賦偏憂國聲名實在人  
風驅平野霧地轉濁河春俠氣空成嘆荆卿舊入秦

一豫讓橋在順德城  
內俗呼爲板橋

爲郎殊客禮領郡重予招積雪留孤館飛觴動幾宵



有家何處定多難此身遙國士淹今日應悲豫讓橋  
送別楊中貴使武當

登覽君何處雲霞滿太和身輕鳥外轉心定虎邊過  
紫極飄鐘磬丹梯上薜蘿采芝獻帝子靈秀得來多  
春日大風集馬雲從園亭有感

春風何太急野水忽波瀾天遠孤鴻落亭虛萬竹寒  
田園殊愛靜稼穡久知難百感逢今日蕭條醉裏看  
送鄴宰石中美轉永州別駕

策馬零陵道關山渺萬重霜明三楚樹雲亂九疑峯  
宦迹驚秋草憂心坐曉鐘佩刀應不負幾爲問邊烽

初春侯兵憲舉舜宅回漭別駕時乘賦得明  
字

共酌憲臺晚揮觴催賦成旅懷春慘澹吾鬢雪分明  
倚竹三湘夢披雲五嶽情有人正吹笛風散落梅聲  
客餽數鷄夜置卧內以避鼠狼之患因誦子  
美詩感而賦此

鷄棲草屋同忽憶杜陵翁攬夢知無意因詩見有功  
群雛從蓄後五德可憐中啼罷窺窓色開門候小童  
暮秋夜柬宗上人

山城搖落夜感慨幾人同舊館殘孤燭秋原老百蟲



不踈漂泊際心定寂寥中亦有逃禪意明朝過遠公  
對酒

濁醪爾何物使我世無求白鳥忘機處黃花滿意秋  
聲名中散累瘴癘伏波愁自信無羈者江鄉一釣舟  
送朱員外以彙奔喪瀘州

中原遊宦子動有白雲思萬里奔喪日千山極望時  
汶江天外水巴樹雨中枝淚盡心應折城烏終夜悲  
度太行山有感

客貧無定處策馬去蒼茫回首意何極知心交自長  
野雲低遠水山鳥度斜陽萬折艱危盡吁嗟此太行

圓通閣待月

曇雲帶暝色傑閣共登時促席聊傾酒含毫未有詩  
星河動深夜烏鵲定高枝望望海天迥清光何到遲

登樓晚眺達軒子同賦

客子聊乘興王孫共倚樓風煙平埜夕砧杵異鄉秋  
半醉還成賦同懷豈倦遊望中有漳水解傍鄴臺流  
讀潘國主詩集三首

愛學先王賦趨庭憶舊時風神識者見格力迥然知  
古棧盤多險蒼峰出衆竒因嗟漢帝子一句栢梁詩



先王傳一脉神秀太行分地擁鄰城樹天留護殿雲  
能詩不自滿好客益多聞猶爲鄒陽惜遊梁未得君

三

道在先王逝由來大雅同才全竒崛下氣勝混茫中  
授簡猶梁苑求賢豈雪宮長吟花鳥近樂善倚春風  
走筆酬王賓相世祥

積陰無好况寥落度中秋雨濕他鄉樹雲昏昨夜樓  
莓苔連砌滑烏鵲抱枝愁咫尺難乘興因思王子猷  
秋夜宿東林寺

籠中一燈盡籠外幾蛾回夜久僧同話霜明門半開

寒聲虛竹院秋色淨蓮臺還擬東林約孤筇踏月來

傾樓有感二首

樓傾予不死骸骨轉堪哀身向風濤出心驚虎豹回  
一貧天意在萬幸旅顏開非夢元龍道茅茨爾樂哉

二

高樓經此厄消息到吾鄉生死身千里妻孥淚幾行  
病多猶是堊詩健有餘狂隨處一登眺艱危終不忘

牀爲頽壁所毀戲成短律

詩傳災木久爾甚木災時莫問成何處堪嗟壤有期  
江湖由旅夢風雨伴吾思枕畔如橫劔龍精可護持



牀壞謝雲洲文

覆載猶天地棲遲心獨寬攤書風展亂欹枕月生寒  
遠若齊環碎寧同趙璧完主人能愛客折簡問平安  
次張祐金山寺之韻

孤絕寒逾迥蒼茫夜不分僧歸依鳥月龍定縮江雲  
天漢窓前合風濤枕上聞好沽瓜步酒詩思在微醺

北望五首

近聞京國報北望起遐思世道龍堪隱邊愁鴈亦知  
宮雲忽變色御水漸流澌上苑涼飈急棲鳥不定枝

二

戎馬何時定愁雲直北看朝廷殊見遠將相各知難  
風亂邊聲急霜連兵氣寒中天問明月曾照漢家壇

三

十月嘶胡馬南來飲潞河論功自有定報國豈無多  
霧擁宮門隔星飛羽檄過中興見神武不許郅支和

四

鼓角昏黃過關山太白高往來驕虜數賞罰聖心勞  
俠士惟龍劍材官幾豹韜城雲自寒色時擁漢旌旄

五

胡笳徹幾甸御柳動蕭森肝食三秋檄宵衣九塞心



風霜偏氣慘節鉞更憂深近日天顏解山河散積陰  
季冬夜西池君見過

昔枉信陵車侯生一敝廬自甘昭代隱擬著老農書  
山暝登樓外庭寒掃雪餘相知在古道寧復曳長裾  
除夕西巖君見過同酌

春光在何許客裏只燈花分却梅窓與來尋草舍家  
夜寒餘巷雪暝色聚城鴉明日誰同醉應思舊歲華  
春日書懷

遠道馳鄉夢歸期隔歲華山川醉裏賦鷄犬客中家  
巷僻餘春雪城高駐晚霞鄰翁訝踈懶相見問生涯

悼懶雲上人

禪徑積莓苔松風還自來塔鈴空響徹簷蔔但花開  
燈失定時影爐存身後灰共知其寂滅林鳥不須哀

憶廬山東林寺

上方閒日夜下界有風波徑石封蒼蘚龕燈照碧蘿  
心空不假悟佛在亦應多未攬匡廬勝浮生奈老何

送徐生歸臨清

婚嫁了心事翻多千里情關山渺行色風雨緩歸程  
舊業浮雲盡新愁芳草生故園春又老黃鳥斷腸聲  
夜過昭覺禪院因憶懶上人同南泉西巖西



池諸文賦得嗟字

重到談經處蕭條人共嗟禪心餘貝葉老眼訝天花  
孤磬風猶裊雙松月自斜太虛渺無際知是遠公家

昭覺禪院同南泉西巖二君賦得天字

相約多幽事頻來有靜緣法雲高捧月祇樹暗藏天  
垂老堪投社無心自會禪誰爲息機者默坐奕碁邊

寄孔方伯汝錫

事有關天地誰當著述名山林一身重鐘鼎幾人輕  
芳樹杯中色流泉枕畔聲應憐玉堂月遊宦老方城  
立秋登臺有感

歸心幾東向大火却流西杖履臨臺迥雲霞傍客低  
此身猶白鶴何處更丹梯梧葉先彫落今宵風露淒

次張汝任圓通閣餞別韻

倚閣憐分袂祇園夜尚遊松深孤磬落杯滿數星浮  
別浦蒹葭暗他鄉蟋蟀秋誰知獨醒者平子不同愁

夜過雲洲翁時有太原之行賦此言別得踈  
字

黃金無定物何事繫親踈文字交能久心期道有餘  
坐中千里客別後幾函書感慨今何夕梧桐落葉初  
雲川書齋同雲洲諸丈留別賦得多字



六月期幽賞銀塘有芰荷詩從老年健情到別時多  
夜濕草間露秋橫天上河王孫共今夕郢調付雲和  
七夕敬誠二君餞別得秋字

北斗掛城頭明河迥不流人間清露夜天上白榆秋  
聚散多岐路悲歡自女牛誰知老來拙回首故鄉樓  
七夕裕軒昆季留酌賦得同字

織女渡河漢今宵誰見同從教鳳馭轉豈待鵲橋通  
庭浥三更露梧飄一葉風古來爭乞巧天意杳冥中  
山中夜行

鷄犬無聲處關山行路時中宵孤月出北斗半空垂

澗迥泉逾響崖懸石更欹停鞭一回首艱苦欲何之  
積雨感懷

積陰無曉夜雲氣壓城頭雀共踈簷雨人同老樹秋  
晉山何慘色汾水亦橫流此俗非荆楚鄉心重倚樓  
暮雨

坐聽蕭蕭急無風池亦波庭花秋幾許窓雨夜偏多  
老矣鄉關夢悲哉燕趙歌不須臨曉鏡空自嘆蹉跎  
秋日自遣

甘向清時隱無令素願乖存虛饒氣色撥累緩形骸  
葉響風前樹苔青雨後階何須學宋玉登眺苦秋懷



中秋有感

客邊無節序吟嘯往時同故里苔三徑名園桂幾叢  
琴樽孤夜月朋舊各秋風坐對青山好蒼茫灑氣中  
中秋夜登樓憶昭覺寺因寄德平鎮康安慶

三王

勝事招提境群才子建流人天各處夜仙桂滿輪秋  
圓缺應相感登臨每獨愁浮雲亦暫爾莫傍仲宣樓

對酒

吾愛李供奉冥然不可親花前今日酒地下古時人  
物色歸心鏡風騷在角巾相逢莫辭醉百歲一浮塵

對西山

好山俱在目樓上坐移時碧樹亦佳侶白雲非遠期  
心閒聊對景興轉別成詩操筆有常變兵家韓信知  
聞李大叅子高出送楊中丞過成晉驛賦此

寄懷

西河能鎮靜亦有送迎勞山共夕陽迥天連秋氣高  
壯心應節鉞行色且旌旄回首顧寒雀飛鳴傍野蒿  
登東關寺浩然臺

老存浩然氣今上浩然臺世事成千古商歌寄七哀  
樹高山色斷天迥鴈聲來更與休公約秋花作意開



董卓壘

石艾郭東路行行薄暮天農桑晉甸服文軌漢山川  
澗水風猶咽林花火似然空餘董卓壘不使後人憐

綿山懷古

綿山憶介子歿後幾年春獨有英明主終憐患難臣  
斷霞餘古燒悲鳥自荒榛歲歲逢寒食其如惆悵人

同張羽士過玄通觀登閣醉賦

近識張平叔相從豈在深一樽誰放達三晉此登臨  
秋氣騷人賦山光靜者心玄都卽蓬島何必海東尋

贈周子才

太原文事苦桃李兩逢春紫塞北連晉黃河西限秦  
多憂繫國遠有道在官貧定識王通輩收爲經濟臣

寄周惟正二首

遊燕已歸晉傾蓋憶多時雲樹心西向關河夢北馳  
青山秋更好白鳥舊相知不道今衰朽仍傳謝客詩

二

龍谷絳城北雀臺漳水頭太行分兩地明月共三秋  
每得邊庭報仍懷上國憂曾連曾見許同醉帝京樓

九日感懷

樓上獨臨眺悠然秋興長妻孥遙念老朋好更憐狂



地轉惟漳水天連一太行菊花慘無色寂寞又重陽

郊送張肖甫

平子愁能賦予愁更幾何淚中心事盡客裏世情多  
青眼交仍好黃花節又過離亭獨悵望車馬渡汾河

秋懷

東望太行路巉巖幾斷崖易歸千里夢難遣九秋懷  
夜色霜明樹寒聲葉滿階著書思趙邸靜掩舊茅齋

無營

無營詩亦苦謾說有營勞鳥宿三更轉松涼孤月高  
客情踈晚計人事重秋毫我欲棲林壑忘言醉濁醪

倚樓

應接妨詩興淹留倍旅情別家仍有累浮世豈須名  
山遠暮霞色林踈秋雨聲此樓非我室愁思度陰晴

送兒元炳東還

吾兒同入鄴今日汝先歸留滯鄉音改飄零舊業違  
關河通古道風雨倍春衣寄我思親淚西原洒落暉

十四夜無月

皓魄將圓夜張燈坐草堂孤城低雨色萬戶失秋光  
笛裏關山暝樓前煙霧蒼金波若滿地隨處有壺觴

三臺



歌舞千年計鸞輿去不回豪華空四野霸業有三臺  
水闊雲仍度沙寒鳥獨來黃花風露裏寂寞爲誰開

懷古

吾憐李供奉白首獨長吟去國生前計憂時醉裏心  
三危毒草徧五嶺瘴煙沉客路終漂泊山猿悲至今  
夜宿齊嶺口

空林煙火夜茅宇暫幽棲缺月低松杪流星墮嶺西  
浩歌當綠酒逸興在丹梯不見功名客飄然獨杖藜

夜登瑤臺

瑤臺當絕頂乘月一躋攀河嶽憑闌外星辰拂袖間

身輕雲自度心遠鶴俱閒幾欲招仙子天風聽珮環

山晚

日落川原迥商歌獨放情千峰連暮色萬木亂秋聲  
流水相廻合閒雲自送迎人家隔煙浦燈火望中明  
同孟懷之錢子青酌白雲洞

古樹敞巖扉相携傍翠微興高松鶴下坐久洞雲飛  
天地浮生老山林勝會稀不知蟬冕客白髮幾人歸

春閨

深院飛花急臨風祗自哀又看春色老坐使玉顏摧  
落月窺琴室流塵上鏡臺窓前有梅樹歲暮待君開



春歸有感

雨歇上林靜春歸東閣虛欲煩青鳥使遙寄美人書  
柳出宮雲外鴉鳴海日初只今彈缺者不爲食無魚

送吳子遊秦嶽

送爾西江客探奇東嶽峯斷文餘漢石古色有秦松  
倚杖海天近聽泉雲壑重金箱閱丹訣誰共訪仙蹤

送周藩王廣文歸錢塘

長安芳草歇多病賞心違落日三江滿秋風一櫂歸  
雨來寒鴈失潮上夜鐘微梁孝懷詞客無勞訪釣磯  
八月十三夜譚鴻臚子羽第同李太史子實

張給事巽卿莫膳部子良賦得秋字

當樽月欲滿良夜故同遊宮闕散清霧星河懸素秋  
病多還授簡客久數登樓喜結淮南侶非關桂樹留  
苗仲材告別登樓晚眺得天字

青山出半天一帶迥蒼然亂樹餘秋色寒城更暮煙  
交游多惜老離合幾經年共有登樓賦誰爲王仲宣

送王端甫歸蒲坂

惜別京華道秋風送馬蹄日斜孤鴈外家遠萬峯西  
歸計聊樽酒行歌且杖藜何時首陽下共爾弔夷齊

送陸秀才歸華亭



九月清霜下三江白舫歸芙蓉寒始發鴻鴈暮還飛  
自許同張翰誰憐滯陸機讀書滄海上燈火映林扉

周子才惠菊并酒

分我名園種迎霜花正開故山有籬落秋色此亭臺  
坐賞成孤酌吟看信幾回因君興不淺昨遣白衣來

登榆林城

憑高望不極天外一鴻過萬嶺夕陽盡孤城寒色多  
蘆笳滿亭堠羽檄度關河遙憶龍庭土嚴霜正荷戈

寄蘇明府子志

不見方城宰三年隔帝鄉政聲猶單父春色似河陽

一別青雲渺相思綠草長何人見君意海月照虛堂

落花有感

花開驚節序花落轉堪悲物色殊無意春風暗有期  
蝶迴芳草徑鶯度夕陽枝獨有豪華子青樓醉不知

望西山

西山久不到花鳥向何人風散石崖雪天開湖水春  
老僧虛白社騷客負青蘋底事燕京陌黃塵滿角巾

贈平鄉趙隱君

風霾起薄暮有客嘆歸歟白首猶懷刺青山且著書  
故鄉春樹外別館夜鐘餘不見磻溪叟終然載後車



夜發忻州中途雨雪至原平驛有感

吾豈請纓輩聊爲鴈塞遊  
夜行風雪路老結古今愁  
焰濕仍餘火身寒只散裘  
僕夫相嘆息孤驛且停留

崞縣雪後夜發

天地混同色開關夜雪時  
行人已在路宿鳥正安枝  
欲曉明星隔緣水瘦馬遲  
鴈門荷戈者龜手竟誰知  
李兵憲廷實遣使郊迎

夜盡驅車力遙看曙色開  
層城林杪出一騎雪中來  
道在交應遠思深書復裁  
亦知迎送意使者亦徘徊  
野望

西北消烽火邊關罷檄書  
寒聲惟鳥雀野色但村墟  
石秃燒山後崖明帶雪初  
誰爲籌國者雲物渺愁予

虜復寇岢嵐

三冬幾烽火諸將亦豪雄  
月冷胡笳斷雲低漢壘空  
勲名身後別邊議眼前同  
枯木惟啼鳥淒其向晚風  
除夕有懷

除夕歸期過孤幃嗟未休  
翻疑虜消息轉使客淹留  
積雪寒連塞明星曉近樓  
遙知不寐處併得兩年愁  
劉計部伯東甲叅戎德承出餞郊亭

久滯邊城客相知遽別難  
山人非祿食世事轉憂端



日暮鴉聲亂春初野色寒醉來能上馬猶作壯年看  
過忻州西崦君郊餞賦此志別

郊亭擁敝裘寒色未全收坐覺風塵倦翻爲歌舞留  
銀箏寫離思玉笋寄鄉愁隨處看春草王孫不共遊  
客居卽事

客居何懶慢過午尚科頭老得醫書喜閒增詩債愁  
春寒風偃樹天晚雪明樓莫謂常漂泊西來是壯遊

觀種菊

園丁初種菊客子欲吟秋每得東籬醉寧思上苑遊  
凌霜根自別帶雨葉偏稠獨滿黃花意吾生不外求

遊水竹園孔丈同賦

移得南山竹水霜見苦根春流觸自響清影暮何繁  
色蘸杯中綠涼沾雨後痕鄒枚此同賦勝事卽梁園

端陽懷古

客舍驚重午何勞蹋草行艾芳堪自把杯綠待誰傾  
魚腹三閭恨龍船萬古情離騷聊一誦醒醉過浮生

偶題

垂老尚多事坐思傷我神銜恩曾有雀負德竟何人  
野曠橫流夕山深毒草春相逢且樽酒披豁見誰真

述感



藁苑混芳蕙不語一心閒高枕是非外端居醒醉間  
溪深多白鳥地勝幾青山更有清風伴儵然時往還

次宋伯鎮遊王文父西園韻

郭西車馬路塵外薜蘿園樓迥晴雲合庭閒秋草繁  
素心猶白鳥幽事且芳樽地勝人多賦青山誰並存  
弔郭有道墓

賢哲遺碑古中郎無愧顏名超黨錮外道著隱淪間  
朱鳳一鳴世白雲長在山祠前挺蒼栢過客莫能攀

李子田有事代州聞虜犯羊防口幡然歸縣  
賦此寄懷

遷客復行役翩翩向代州塵飛隨宦轍雲暝結邊愁  
歸鳥異鄉樹悲笳何處樓黃花老山縣相待幾枝秋  
東林寺夜集不與次西巖君韻

廬山在咫尺鐘磬落諸天不到真如地遙看香積煙  
輪蹄雙樹下語默一燈前欲問無生法衰頽獨慨然  
雨後送劉孝夫東歸

相見淒涼色孤懷風雨天黃金交易薄清鏡老堪憐  
馬出燕南路家臨濟北田送君一長嘯高鳥沒蒼煙

京師大雨

夜來雨何急睡起問兒曹秋響門前水寒生樹裏濤



素居鄰市井老計託風騷好爲衝泥去新豐貰濁醪  
中秋夜南園同故人酌

不謁金張第相期松桂邊人須今夜酒月朗故鄉天  
歸思逢秋色狂歌度老年陰晴如可定早上玉峰巔

題悟上人像

七十人間過禪棲近國門山開惠遠社松抱給孤園  
天地形須盡虛空性自存久知真是假相對更何言

寄東平劉成卿二首

有才官遽罷知爾國憂深涕淚看春草艱難返故林  
全生恩到骨獨卧夢驚心龍劔多靈異還疑風雨吟

二

爲郎信老矣獻策豈徒然生死酬恩日行藏抱病年  
交踈茅屋下心澹野雲邊湖水秋來盛時能訪釣船

題東方朔圖

曼倩有仙骨棲遲金馬門丹成猶混俗道在不言尊  
何事禽經著難將人世論君王時一笑白首是殊恩

送王給事佐之潞州封王

路出西山遠城依上黨高白雲何處望赤日此行勞  
帝子周封建天臣漢節旄晝遊還洛下氣色滿宮袍

酬李總戎見寄



遼海傳書札神交若舊遊此時臨紫塞何意及滄洲  
霜露孤懷夜功名百戰秋君今漢飛將會見早封侯

酬楊以公見寄時鎮易州

山城壯開府驄馬舊論功國步多憂裏兵機獨見中  
旌旗搖海月笳鼓振邊風無限材官策憑君有異同

四溟山人全集卷之五終



